

ՍՓԻԻՌԱՀԱՅ ԳՐՈՂ ԱՆԵԼԸ ՊԱՐԳԵԵԱՏՐՈՒԵՑ ՄՈՎՍԷՍ ԽՈՐԵՆԱՑԻ ՄԵԴԱԼՈՎ

ՀՀ Նախագահ Ռ. Քոչարեանի Մարտի 31-ի հրամանագրով սփիւռահայ բանաստեղծ և վիպասան Անելը (Կարօ Կարապետեան) վաթսուամեայ գրական ակնառու ծառայութիւնների համար պարգեւատրուել է Մովսէս Խորենացի մեդալով:

Այդ պատուաւոր պարգեւը Մայիսի 7-ին Փարիզում գրողին յանձնեց ՀՀ դեսպան Էդ. Նալբանդեանը:

Անելը ծնուել է Երուսաղէմում, յաճախել է տեղի Սրբոց Թարգմանաց Սգգային վարժարանը, այնուհետեւ՝ Ֆրանսիական կոլեջը: 1944 թ. մեկնել է Լիբանան ուսանելու Բեյրութի ֆրանսիական բժշկական համալսարանում: Սրտաբան բժշկի իր մասնագիտութիւնը կատարելագործել է Բոստոնի Հարվարդի համալսարանում, դառնալով յայտնի մասնագէտ և հետագայում դասախօսելով այնտեղ: Որպէս բժիշկ երկար տարիներ աշխատել է Երուսաղէմում և Միացեալ Նահանգների տարբեր քաղաքներում:

Անելը սկսել է գրել վաղ հասակից: 1945 թ. լոյս է տեսել նրա բանաստեղծութիւնների առաջին ժողովածուն՝ «Մութ Ցաւեր» վերնագրով, 1949-ին՝ «Տեսիլք Գիւնովի», և 1955-ին՝ «Պարը Յոյսին» հատորները: Բանաստեղծութիւններից զատ նա գրել է նաեւ արձակ գործեր՝ 1975-ին հրատարակուած «Որդի Մարդոյ» վէպը և այլ:

Անելի գրական գործերը տպագրուել են սփիւռքի քաղմաքիւ պարբերականներում: Բանաստեղծութիւնների և վէպերի մի քանի ժողովածուներ սպասում են հրատարակման:

Երկարամեայ գրական ընդուն գործունէութեան համար Անելը արժանացել է «Սուրբ Յակոբ» շքանշանի (1968 թ. Երուսաղէմ), «Սուրբ Ներսէս Շնորհալի» և «Սուրբ Սահակ-Մեսրոպ» շքանշանների (1985 և 1992 թթ. Էջմիածին), «Սուրբ Գրիգոր Լուսաւորիչ» Ա. Կարգի շքանշանի (1997 թ. Էջմիածին), «Սուրբ Մեսրոպ Մաշտոց» շքանշանի (1998 թ. Ամթիլիաս): 1998 թ. անդամակցում է Հայաստանի Գրողների միութեանը:

Հայաստանի Հանրապետութեան
դեսպանութիւն
Փարիզ